

REGLUGERÐ

um náttúrurannsóknir erlendra vísindamanna á Íslandi.

1. gr.

Engum útlendingum er heimilt að stunda náttúrurannsóknir á Íslandi nema að fengnu rannsóknarleyfi, sem menntamálaráðuneytið veitir. Undanskilin reglugerð þessari eru þó leyfi erlendra hafrannsóknaskipa til rannsókna innan íslenzkrar fiskveiðilögsögu, sem sjávarútvegsmálaráðuneytið veitir.

2. gr.

Umsóknir um rannsóknarleyfi skulu sendar Rannsóknaráði ríkisins, sem gefur út leyfi í umboði ráðuneytisins, að fenginni umsögn vísindastofnana eða vísindamanna, sem starfa á viðkomandi sviði. Rannsóknaráð skal senda Náttúrufræðistofnun Íslands til umsagna allar umsóknir um rannsóknarleyfi á sviði almennra náttúrurannsókna.

3. gr.

Umsókn skal fylgja ítarleg greinargerð um fyrirhugaða rannsóknarstarfsemi, þar sem m. a. séu tilgreind tæki þau, sem nota á. Nöfnum umsækjenda skulu fylgja upplýsingar um þjóðerni, menntun og fyrri störf við svipuð verkefni og fyrirhuguð eru á Íslandi. Æskilegt er, að umsóknum fylgi einnig meðmæli frá þekktri vísindastofnun.

4. gr.

Rannsóknarleyfi er jafnan bundið við ákveðið svæði og ákveðinn tíma. Leyfi er að jafnaði ekki veitt til rannsókna á þeim verkefnum, sem íslenzkir vísindamenn hafa með höndum eða munu taka fyrir í náinni framtíð. Leyfishafa ber að kynna sér lög um náttúruvernd og önnur friðunarlög og fylgja þeim í hvívetna. Ekki er heimilt að safna fuglum og eggjum án sérstaks leyfis menntamálaráðuneytisins. Rannsóknir ber að framkvæma á þann hátt, að ekki hljótist af spjöll á náttúru landsins og að ekki sé gengið á lögmætan rétt landeigenda. Þeir, sem rannsóknarleyfi hljóta, skulu sjálfir leita samþykkis landeigenda fyrir dvöl á landi hans og aðra notkun þess. Ný örnefni má ekki nota á landabréfum eða í prentuðu máli, nema sérstakt leyfi ráðuneytisins komi til.

5. gr.

Leyfishöfum ber sjálfum að afla nauðsynlegra leyfa til innflutnings á tækjum og öðrum útbúnaði vegna rannsókna. Þeir skulu bera allan kostnað vegna leiðangursins, nema um annað sé samið sérstaklega.

6. gr.

Náttúrugripi má ekki flytja úr landi, nema með leyfi Náttúrufræðistofnunar Íslands og með þeim skilyrðum, sem stofnunin setur hverju sinni.

7. gr.

Rannsóknaráð ríkisins felur að jafnaði einhverjum íslenzkum aðila að fylgjast með rannsóknunum. Hinir erlendu vísindamenn skulu þá vinna að rannsóknum sínum í samráði við hann. Áður en leiðangursmenn fara úr landi, skal þessum aðila afhent bráðabirgðagreinargerð um rannsóknirnar.

8. gr.

Þegar unnið hefur verið úr niðurstöðum rannsókna, skal Rannsóknaráði send fullnaðarskýrsla í þremur eintökum. Einnig skulu Rannsóknarráði send fimm eintök af öllum greinum, bókum eða kortum, sem gefin eru út varðandi starfsemi leiðangursins.

9. gr.

Brot gegn reglugerð þessari varða sviptingu rannsóknarleyfis og fjársektum samkvæmt því, sem lög mæla fyrir um.

10. gr.

Reglugerð þessi er sett samkvæmt lögum nr. 48/1965, um almennar náttúru-rannsóknir og Náttúrufræðistofnun Íslands, og lögum nr. 64/1965, um rannsóknir í þágu atvinnuveganna, og öðlast þegar gildi. Jafnframt er úr gildi felld reglu-gerð nr. 164/1952, um náttúru-rannsóknir erlendra vísindamanna á Íslandi.

Menntamálaráðuneytið, 25. marz 1968.

Gylfi Þ. Gíslason.

Birgir Thorlacius.

S A M Þ Y K K T

um stjórn bæjarmálefna Seyðisfjarðarkaupstaðar.

I. KAFLI

Um skipun bæjarstjórnar og verkefni hennar.

1. gr.

Bæjarstjórn Seyðisfjarðar er skipuð 9 bæjarfulltrúum, kjörnum skv. lögum nr. 58/1961.

2. gr.

Bæjarstjórn Seyðisfjarðar er almennt í fyrirsvari fyrir bæinn, og skal engu máli, er hann varðar, til lykta ráðið án umsagnar bæjarstjórnar.

Bæjarstjórninni ber að gæta hagsmuna bæjarins í hvívetna og annast þau viðfangsefni, sem henni eru fengin í lögum og reglugerðum, svo og málefni, sem henni eru fengin í samþykktum, er hún hefur sett eða á henni hvíla að öðru leyti.

Meginverkefni hennar eru þessi:

a. Bæjarstjórn fer með yfirstjórn á fjarreiðum bæjarins.

1. Árlega ber bæjarstjórn að gera áætlun um tekjur og gjöld bæjarins fyrir hvert reikningsár (almanaksár), og eigi síðar en í marz mánuði. Í fjárhagsáætlun skal greina í meginatriðum, hvernig fjárveitingu til einstakra stofnana skuli hagað, sbr. b-lið, enn fremur skal greina, hvernig áætlaðar tekjur skiptast.